

吳邑志卷第六

境內壇廟祠宇

大祀三

廟一

文廟

文廟在邑東南府學之東按祥符圖經云蘇州孔子廟在子城西南唐刺史李栖筠始作學廬其傍則廟在唐已有之五代至宋學廢廟存然湫隘不足將事迨司諫范仲淹來爲州牧乃始以故吳越南園表建學宮且移廟寘焉建炎四年學既燬于兵紹興十一年直學士梁汝嘉重

建廟學像設有無未聞然十五年直學士王喚增繪兩廡像則知殿上乃有像也夫子南面以王者服居尊自唐開元以來爲然非特宋也元之大德海風煽灾廟室盡壞治中王都中勸募運使朱虎鼎建事具學校詳矣入我

國朝洪武五年知府魏觀正統元年侍郎周忱知府况鍾相繼勗建績尤偉卓于時改塑聖像皆用國工妙絕冠天下又於兩廡塑諸賢像亦工妙然其大成樂舞每丁祭以諸生供事音容不備景泰三年知府汪濬請嘉興樂師與其學

生三人來教尋廢不習天順三年知府林一鶚重建廡舍去塑像設木主成化十年知府丘霽以廟卑小不稱於宇始改作大殿於舊址之北移西者二丈有奇移先聖四配十哲塑像於中又重建東西廡各二十一間又使人至金陵請神樂觀樂師來蘇諱老氏徒教之肄習功垂成而丘去位知府劉瑞續成之十三年

詔增進豆餼數正德五年知府林廷楫又塑兩廡諸賢像有司遵奉典制每歲以春秋仲月上丁日致祭必丁日者取陰火文明之象也凡祭

用少牢羊一豕一登銅簞簋籩豆帛皆如制獻
官陪位悉服進賢冠玄端大帶綦履秉笏并用
堂上下樂佾舞六十四人以素王禮事焉今以
從祀殿廡古今諸賢具列如左

四配

克儔沂鄒俱爵上公

十哲

費薛黎衛魏鄆齊徐吳陳俱公爵

東廡

五十四位並侯伯公爵或無封

西廡

五十五位並侯伯或公爵

壇二

北壇 南壇

府社稷壇宋置在子城西南四里元移置盤門

外洪武初改建於長洲縣閭門外石牌巷尋遷
吳縣義慈巷今壇是也初附郭二縣古各有壇
今皆統祭于府按

國朝禮制凡遇祭祀隨處但長官行三獻禮餘
官止陪祭武官並不預祭祭期每歲用仲春仲
秋上戊日也

府社之神

府稷之神

壇制

四出陛陛各三級四門紅油由北門入

石室一

埋於壇南正中

神牌二

殊漆青字

府之風雲雷雨境內山川城隍壇在吳縣一都

盤門外宋在吳縣西南四里元徙符門外洪武
間再移于此按禮制凡府春秋仲月上旬擇日
同壇祭設三神位風雲雷雨居中帛四山川居
左帛二城隍居右帛一帛俱白色附郭縣官止
隨班行禮不別祭其奠帛初獻先詣中前次詣
左前次詣右前亞終同初

風雲雷雨之神 山川之神 城隍之神

神牌三 朱漆青字

已上二壇獻陪俱祭服

群祀六

廟三 神一 啟一 春秋一

府城隍廟原在子城西南陬莫詳其所始相傳
以春申君爲之唐天寶中採訪使趙居貞改作
廟宇有自撰碑文梁貞明五年刺史錢元璩備
加宏飾亦附其事於碑陰至宋時守臣累以水
旱蝗疫禱祈有應請封有勅累封忠安順應威
顯英濟王

國朝洪武二年正月下

制凡城隍之神皆新其命本府亦封鑒察司明
城隍威靈公至三年有司以舊祠卑陋乃即雍

熙寺故基改築在今武狀元坊內有
敕革去前代舊號但名之曰城隍之神按

本朝禮制城隍神祭在南壇內與山川同位春
秋二行事又每歲厲壇春清明日秋冬二孟朔
望日祭無祀鬼神其壇設於城北郊先期三日
主祭官詣城隍神發告文至日設神位於壇上
跪獻酒三畢遂讀

欽依祭文以神主祭是則一年五祭皆有所
於廟不行事也按宣德十年七月禮部題

准新官到任於城隍廟會諸應祀神祇用豬羊

二牲認祀又按官制凡官九年考滿仍具牲酒
率官屬父老人等詣廟辭復會諸神致祭凡祭
官初到任及去皆行

吳恭伯至德廟在闔門內東漢桓帝永興二年
太守糜豹建於闔門外孫莫至唐天寶約七百
年採訪使狄梁公盡毀江南淫祠而此廟特存
後梁乾化二年吳越武肅王錢氏始徙置於此
宋元祐六年知軍州黃履奏賜額曰至德崇寧
元年知府吳伯舉請疏上爵有詔封至德侯淳
祐六年春提刑潘凱款祠已而趨兩廡下見土

木塑像諸詭異列陳其中退亟戒其屬撤之乃
像仲雍季札侑泰伯祀并叙其系自古公至友
爲世三十三刻之石焉至

國朝洪武二年例改封曰吳泰伯之神定爲春
秋二祭宣德五年夏知府况鍾始至以蘇多囂
訟思以禮讓化之亟率父老謁祠下見其頽圯
即日塗墍翻堉凡脩飾舊屋四十楹皆一新閱
乂復弊成化二十三年巡按御史張淮復加創
作今廟惟設仲雍像無季子不知何時去之也
有碑四通皆南宋以下撰述古作亡焉凡祭用

特牲豕二獻陪俱祭服

吳相伍大夫廟在本縣盤門內舊在縣西南二
十二里胥山上即子胥死處俗云胥王廟自漢
以來皆祭於此其神甚靈酒盡杯舉宋元嘉三
年吳令謝詢始徙廟入城歲久迷其處所惟城
西南隅永昌武大王廟祭享繁盛自昔相傳以
爲伍公廟建中靖國元年直秘閣吳伯舉知蘇
州乃率吏民營繕未幾告新又以名號未正奏
賜額曰英烈元大德三年怒潮作于浙上禱而
獲止守臣以聞加封忠孝威惠顯聖王至正十

二年廉訪僉事李仲善奉檄築城乃作新廟于胥門之上以大夫建邦啓土首築城垣且嘗宅於其傍故也後仍立今廟以遵宋蹟宣德七年知府况鍾撤而一新成化十五年廟又毀于火巡按御史劉魁委知府劉瑀重建初獻陪皆祭服嘉靖二年知府胡纘宗更爲常服今廟貌冕服九章猶昔王封之舊也凡祭春秋二行用特牲豕一

祠三

宋二

今一

宋丞相范魏公祠在義宅歲寒堂東宋咸淳十

年知府潛說友奏建以祀公而四子配焉牲牢鬯幣田有常供獻薦儀文皆當時所定以爲天平山乃公先祠而公附之此則爲專祠也至元二十九年浙西廉訪使徐瑗重加修葺有記宣德七年知府况鍾復奏葺祠撤舊易新恢弘其制爲祠堂五楹東廡祠說友以爲報功又東偏爲書院成化六年巡撫劉孜猶以爲未稱屬知府林一鸚鼎新重建魏公幞頭紫袍像中坐諸子神板侍春秋二祭用特牲豕一

宋太師韓蘄王祠原在靈巖山西麓紹興二十

年敕葬于此墓有穹碑而廟已廢成化十年知府丘霽具疏請祀有

命許之而祭無恒所弘治七年知府史簡以王舊宅在南禪寺傍乃於寺中結茭而祭十一年知府曹鳳以爲非禮謀作廟于冢南脩祀事山民厭其擾不數載盡拆壞之嘉靖二年知府胡纘宗因於其寺前殿撤佛像塑王冕旒七章位其中凡祭用仲秋一行犧牲豕一

國朝夏周二公祠在胥門外運河之西岸夏公諱原吉湖廣湘陰人永樂初以戶部尚書奉

命治水浙西有功圩田高下蓄洩得宜致粒米狼戾斗價十錢凡作工前後幾三載卒謚忠靖周公諱忱江西吉水人宣德正統間以工部侍郎來巡撫立攢運法及水次倉在任二十餘年孜孜爲公官民俱裕卒謚文襄二公澤覃七府顧未有專祠弘治十一年常熟知縣楊子詭以其報功之典具請于

朝欲乞各府並祀

詔下所屬詳勘巡撫彭禮公以爲府各爲祠事涉繁瑣看得蘇當諸府之會宜以建祠由是每

歲以春秋丁後一日

命本府官將事十三年知府曹鳳委同知林廷
璣董功創建祠後又爲仁風亭備登覽及老氏
館其傍使可居守今官河傍暈飛者即此祠也
議者猶謂江南功烈况侯忠賢尤著以配允宜
有其舉之望將來云凡祭用少牢羊一豕一

已上三壇獻陪並常服

吳邑志卷第六

吳邑志卷第七

人物傳一

周

周

漢

吳

季札吳子壽夢子也壽夢有子四人長諸樊次
餘祭餘昧最次季札壽夢以季札賢欲立之季
札辭讓不敢當壽夢卒諸樊以適長攝行事當
國政諸樊元年已除喪讓位季札季札不受而
耕於野乃舍之諸樊將死命弟餘祭必以位及
季札乃封季札於延陵號曰延陵季子餘祭立
四年季札聘魯請觀周樂至齊見晏平仲遂與

定文而長子姬葬於羸傳之間乃行孔子使子貢觀禮焉至鄭見子產去適衛見蘧瑗史鮑皆悅之又去如晉見叔向勗以自免然後歸餘祭卒弟餘昧立四年卒方卒時欲授位季札季札逃去國人乃立餘昧子僚爲君僚立十三年吳圍楚僚使季札於晉以觀諸侯之變楚發兵絕吳後吳兵不得還公子光害僚自立季札還哭僚慕復位而待君子避之季札卒孔子書其葬

勗曰嗚呼有吳延陵君子之墓褒之至也

伍員子胥楚人也其父曰伍奢事楚平王以爲

列在楚門
不一姓也
孔子居魯

太子建太傅少傅費無忌嘗得罪太子慮一日立而見誅乃讒之平王使守城父備邊兵頃之無忌又言太子將兵外交諸侯將入爲亂平王乃召伍奢而按問之奢知其讒諫之平王大怒因囚伍奢而使城父司馬奮揚往殺太子太子奔宋無忌復言奢有二子皆賢不誅且爲楚憂平王即遣使者駕駟馬封函印綬往許召尚賜鴻都侯員賜蓋侯尚信之乃與使俱歸楚員逃去楚乃誅奢及尚俱戮于市員聞太子建在宋遂奔宋宋亂奔鄭鄭以太子爲晉內應乃

誅殺太子太子有子名勝員乃與勝俱奔吳至吳被髮佯狂跣足塗面行乞於市吳市吏異之乃白吳王僚具陳其狀員身長一丈腰十圍眉間一尺僚與語三日辭無復者僚曰賢人也欲爲興師復讎公子光欲謀僚恐員親於僚而害其謀因讒而沮之員知光有內志因辭僚而退耕于野密求勇士專諸進之於光王僚八年遣光伐楚大敗楚師十二年楚平王卒明年公子光用專諸害僚自立爲吳王號闔廬乃召子胥爲行人謀以國事員乃薦孫武員爲行人謀以國事員乃薦孫武于闔廬闔廬與論兵法大悅任用之乃使員與白誣及武爲將攻楚拔舒又取潛六楚國苦之群臣皆怨言費無忌讒殺伍奢而吳侵境不絕九月昭王誅無忌遂滅其族員又破楚於豫章取居巢九年吳王闔廬伐楚五戰至郢昭王出奔闔廬入郢止留員亦以報其父兄之仇也會秦救至吳兵乃歸當是時吳用員謀破楚威齊又服越遂霸天下後越攻吳闔廬以戰死太子夫差立怨越

將伐之越王勾踐懼率衆朝吳而以重寶厚獻
太宰誣誣日夜爲言夫差請釋越王歸國員諫
不聽太宰誣因讒之夫差夫差曰寡人知之夫
差十三年釋越伐齊員又諫又不聽吳乃與齊
戰于艾陵齊師敗績夫差旣勝而還置酒文臺
之上勾踐侍坐欲增其國以問群臣群臣咸賀
惟員據地垂涕而又諫夫差大怒曰老臣多詐
今退自計無沮吾謀員旣還家夫差使人賜屬
縶之劔於員員遂伏劔死夫差乃言曰胥汝死
後何能有知卽斷其頭置高樓上使日炙風飄
之又取其屍盛以鴟夷之器投之江中以食魚
鼈員因随流揚波依潮來往蕩激崩岸於是夫
差乃悔殺員二十三年勾踐伐吳欲入胥門未
至六七里望吳南城見員頭巨若車輪目若曜
電鬚髮四張射於十里越軍大懼卽日夜半有
暴風雨飛石揚砂越軍壞敗却退止於松陵范
蠡文種乃稽顙肉袒拜謝員願乞假道員乃與
種蠡夢曰越如欲入更從東門我當爲汝開導
於是越軍遂圍吳守一年夫差走死陽山下越
旣克吳范蠡辭去大夫文種內憂不朝亦賜劔

死勾踐乃莖種國之西山莖一年員從海上穿山脊而持種去與之俱浮於海故前潮水者伍胥也後重水者大夫種也吳人憐員忠諫而死爲立祠於江上命曰胥山

孫武吳人也善爲兵法辟隱深居世人莫知其能吳王闔廬將伐楚伍員乃薦武於闔閭闔閭乃召武問以兵法每陳一篇輒稱善意大悅令武小試兵法孫武請得試於後宮之女以寵姬二人爲軍隊長左右鼓之婦人皆大笑孫武乃令斬二隊長以徇用其次爲隊長復鼓之皆中規矩無譁武使報王兵已整齊願王觀之惟所欲用雖赴水火可也闔廬不悅曰將軍罷兵就舍寡人不願觀伍員進諫闔廬乃以武爲軍師與伍員同將兵伐楚拔舒殺吳亡將二公子蓋餘燭庸乃歸旣而闔閭怒楚昭王得其湛盧之劍復使武將兵伐楚拔潛與六六年昭王使公子囊瓦伐吳闔閭又使武偕伍員擊楚圍豫章破之遂克巢武乃自豫章與楚夾漢水而陣十月遂破楚衆五戰至於郢昭王出奔鄒十年九月闔閭之弟夫槩潛歸自立爲吳王闔閭聞之

乃釋楚師攻夫槩遂先歸吳師留於淮溼被焚武說伍員引軍歸昭王反國自是莫知武之所終矣武者兵法十三篇

言偃子游吳人少孔子四十五歲北學中國列科文學居十哲之位後代封吳公按言公本住海虞葬虞山梁時猶有故井及搗衣石存其石被郡將蕭定將去今按梁以前海虞屬吳邑未分當為古之邑人也故今首載焉

澹臺滅明子羽孔子弟子南游至江從弟子三百人今吳城南有澹臺湖即其遺跡按湖在盩

門外吳邑地也

附

古封君一人寓賢一人

春申君姓黃名歇楚考烈王相也考烈王卒

幽王立封春申君於吳三年幽王徵春申

君為楚令尹春申君自使其子為假君治

吳十一年幽王徵假君與春申君并害之

二君治吳凡十四年

范蠡一號陶朱公從越王勾踐入朝于吳以

陪臣事夫差躬剝馬草夫差欲用之辭之

卒用計以勾踐歸越致霸爲相功成遂遊
五湖不返今屬吳也多有其蹟

漢

角里先生吳人姓周名術字元道太伯之後漢
高帝時與東園公綺里季夏黃公俱出定太子
號四皓又角里先生一號霸上先生今太湖中
洞庭山西南中有角里村是其所居

嚴助會稽吳人嚴忌之子或言族家子也郡舉
賢良武帝善助對擢爲中大夫與朱買臣等並
左右時征夷開邊軍旅數發內改制度朝廷

多事上令助等與公孫弘辯論大臣數詘與吾
丘壽王同見任用而助先進建元三年閩越圍
東甌東甌告急上廼遣助以節發兵會稽浮海
救東甌未至閩越罷兵漢兵遂出踰嶺會閩越
王弟餘善殺王以降漢兵罷上廼令助諭意風
指於南越南越即遣太子嬰齊隨助入侍助還
上大說助侍燕從容上問居鄉時助對爲友壻
富人所辱上問所欲對曰願爲會稽太守於是
拜爲會稽太守數年不聞問賜書詰責助恐上
書稱謝願奉三年計最詔許因留侍中有奇異

輒使爲文及賦頌數十篇

朱買臣翁子會稽吳人也家貧好讀書不治產業常刈薪樵賣以給食擔東薪行且誦書歌謳道中其妻羞之求去即聽去之後數歲買臣隨上計吏爲卒將車至長安詣闕上書久不報待詔公車會邑子嚴助貴幸薦買臣召見說春秋言楚辭上甚說之拜爲中大夫與助俱侍中後坐事免久之召待詔時東越數反覆買臣因言故東越王居泉山南五百里大澤中今發兵浮海可破滅上拜買臣會稽太守詔到郡治樓船

備糧食水戰具須詔書到軍與俱進買臣衣故衣釋其印綬步歸郡邸有頃長安廐吏乘駟馬車來迎買臣遂乘傳去會稽聞太守且至發民除道縣並送迎車百餘乘入吳界乃悉召見故人與飲食諸嘗有恩皆報復居歲餘買臣受詔將兵與將軍韓說等俱擊破東越有功徵入爲主爵都尉數年坐法免復爲丞相長史子山拊官至右扶風

附

隱德二人

東方朔厥次人久在吳中爲書師十數年武帝時上書說便宜拜爲郎

梅福壽春人成帝時上書言大將軍王鳳專勢擅朝不報福乃居家常以讀書養性爲事王莽顛政福一朝棄妻子去隱九江其後又之會稽變姓名爲吳市門卒

東漢

陸閎會稽吳人篤行好學聰明有令德選尚寧平公主辭疾不應爲潁川太守致鳳凰甘露之建武中爲尚書令孫續仕郡爲門下掾太守

丑興坐楚王英事徵詣廷尉續亦被逮就考終無異辭興等乃得赦還田里遂以義稱

顧綜會稽吳人明帝時辟有道歷御史大夫尚書令帝以正月上日幸辟雍延綜爲三老設几杖乞言受誨其後生雍爲吳丞相

陸康吳郡吳人少篤孝悌勤儉操行太守李肅舉孝廉肅後坐事誅康爲斂尸送喪還鄉行服以義烈稱除高成令州郡上其治狀光和元年遷武陵太守轉桂陽樂安二郡所在稱之時靈帝欲鑄銅人而國用不足乃詔民田畝斂十錢

比水旱貧苦康上疏極諫內倖譖康大不敬檻
車徵詣廷尉坐免歸復徵拜廬江太守獻帝卽
位天下大亂康蒙險遣計吏奉真詔加忠義將
軍秩中二千石時袁術屯兵壽春部曲饑餓遣
使求委輸兵甲康以其叛逆閉門不通內脩戰
備將以禦之術怒遣孫策攻康圍城數重康固
守受敵二年城陷月餘病卒朝廷愍其守節拜
子儁爲郎中少子績吳鬱林太守

附

高士文學各一人

梁鴻扶風平陵人少遊太學尚氣節見洛陽
宮闕侈盛乃作五噫之歌以見意肅宗聞
而惡之求之不得鴻乃易姓名擘妻子適
吳依大家臯伯通居廡下爲人賃舂伯通
察而異之乃舍之於家及卒伯通爲葬于
要離塚傍葬畢妻子歸扶風

蔡邕陳留人仕漢左中郎將後朔方還避怨
于吳顧雍從學琴書

吳

顧雍元歎吳郡吳人漢尚書令綜之後也曾祖

父奉穎川太守初蔡邕從朔方還嘗避怨於吳
雍從學琴書邕嘆異之故名雍字元歎弱冠州
郡表薦爲合肥長轉婁曲阿上虞皆有治跡孫
權領會稽太守不之郡以雍爲丞行太守事討
除寇賊郡界寧靜數年入爲左司馬權爲吳王
累遷大理奉常領尚書令封陽遂鄉侯黃武四
年迎母於吳旣至權臨賀之親拜其母於庭公
卿畢會雍爲人不飲酒寡言語舉動以時權亦
憚之是歲改爲太常進封醴陵侯代孫邵爲丞
相平尚書事其所選用文武將吏各隨能授任

心無適莫時訪建民間及政職所宜轉密以聞

若見納用則歸之於上不用終不

負泄權以此

重之爲相十九年年七十六赤烏六年卒權素

服臨弔謚曰肅侯子邵博覽書傳好樂人倫權

妻以策女年二十七起家爲豫章太守舉善以

教風化大行在郡五年卒官子譚

譚弱冠爲太子中庶子赤烏中代

節度譚初踐官府上疏陳事權輒

食稱善加奉

車都尉薛綜爲選曹尚書固讓譚

選事祖父雍卒數月拜太常遂代雍平尚書事

譚遂代綜領

是時魯王霸有盛寵與太子和齊衡譚上疏極論由是霸與有隙乃構譚坐徙交州卒

陸遜伯言廬江太守康從孫也孫權爲將軍遜始仕幕府歷東西曹令史出爲海昌屯田都尉并領縣事部有二千餘人拜定威校尉權以兄策女配之以爲帳下右部督遂部伍東三郡得精卒數萬人還屯蕪湖呂蒙請建業權問誰可代者因以遜對權乃召遜拜偏將軍右部督代蒙遜至陸口與關羽書推羽功德深自抑晦羽見書意大安無所復嫌遜具啓形狀陳其可禽

權乃潛軍而上使遜與呂蒙爲前部至卽克公安南郡獲羽遜徑進領宜都太守拜撫邊將軍封華亭侯諸城長吏及蠻夷君長皆降遜請金銀銅印以假授初附又攻房陵南鄉皆大破之權以遜爲右護軍鎮西將軍進封婁侯權欲令歷本州舉命乃使揚州牧呂範就辟別駕從事舉茂才黃武元年劉備率大衆來向西界權命遜爲大都督假節督朱然等五萬人拒之備從巫峽至夷陵界立數十屯遜與相持七八月乃率諸軍同時俱攻斬胡王沙摩柯等備升馬鞍

山陳兵自繞遜督諸軍蹙之死者萬數備夜遁
加遜輔國將軍領荊州改封江陵侯劉禪襲
位諸葛亮秉政與權連和時事所宜權輒令遜
語亮并刻權印置遜所權每與禪亮書常過示
遜輕重可否有所不安便令改定以印封行之
七年權使鄱陽太守周魴譎魏大司馬曹休休
果舉衆入皖乃召遜假黃鉞爲大都督逆休遜
自爲中郎令朱桓全琮爲左右翼俱進衝休伏
兵繼之追亡逐北斬獲萬餘休還死諸軍振旅
過武昌權令左右以御蓋覆遜出入殿門賜御

物上珍遣還西陵黃龍元年拜上大將軍右都
護是歲權巡建業留太子居守徵遜輔之并掌
荊州三郡事董督軍國赤烏七年代顧雍爲丞
相荊州牧都護領武昌事如故及太子不安遜
數上書陳列及求詣都口論不許時東宮傳吾
粲坐與遜交書下獄死權累遣使讓遜遜憤恚
卒孫休時追謚昭侯子抗襲爵

抗孫策外孫遜卒時年二十一拜建武校尉領遜
衆赤烏九年遷立節中郎將換屯柴桑建興元
年拜奮威將軍魏諸葛誕舉壽春降拜抗爲柴

桑督赴鎮壽春孫皓即位加鎮軍大將軍領益州牧建衡二年拜都督信陵西陵夷道樂鄉公安諸軍事治樂鄉鳳凰元年西陵督步闡叛降晉抗聞之部分諸軍徑赴西陵敕築嚴圍自赤谿至故市圍始合晉陽肇率師至西陵抗身率三軍憑圍對肇至經月肇計屈夜遁抗使輕兵躡之肇大敗羊祜在江陵亦引軍還抗遂陷西陵城誅夷闡族及其將吏餘請赦數萬口修冶城圍東還樂鄉貌無矜色加拜都護二年春就拜大司馬荊州牧三年夏病表陳乞以西方為

屬秋遂卒子晏嗣晏及弟景玄機雲分領抗兵天紀四年晉軍伐吳終如抗言

晏為裨將軍夷道監

景尚公主拜騎都尉封毘陵侯領抗兵拜中部督與晏皆為王濬別軍所殺

朱桓休穆吳郡吳人也權為將軍桓給事幕府除餘姚長遷盪寇校尉封新城侯為濡須督黃武元年魏使曹仁將步騎數萬向濡須仁欲襲取州土遣其子泰來攻城自將萬人留橐臯為後拒桓因身自拒泰泰燒營而退仁亦遁還權

嘉桓功封嘉興侯遷奮武將軍領彭城相黃龍
元年拜前將軍領青州牧假節卒後家無餘財
權賜鹽五千斛以周喪事子異嗣

異以父任除郎後拜騎都尉代桓領兵官至鎮
南將軍假節大都督從父據

據有姿貌膂力又能論難才兼文武孫權使領
兵屯尚公主拜左將軍封雲陽侯

附

文學一人

陸績康少子也容貌雄壯博學多識星歷算

數無不該覽孫權辟為東曹掾以直道具
憚出為鬱林太守加偏將軍績既有蹇疾
又意在儒雅雖有軍事著述不廢在任卒
年三十一作渾天圖注易釋玄皆傳於世
子宏會稽南部都尉敷長水校尉

張溫吳郡吳人也父允輕財重士名顯州郡
為孫權東曹掾卒溫少修節操容貌奇偉
權聞之延見拜議郎選曹尚書徙太子太
傅時年三十二以輔義中郎將使蜀溫至
蜀詣闕拜章蜀人甚責其才還頃之權既

陰衡温稱美蜀政又嫌其聲名大盛衆庶
炫惑遂因事害温幽之有司下詔斥還本
郡以給廝吏將軍駱統表理温寃不報後
六年病卒

吳邑志卷第七

吳邑志卷第七

人物傳二

晉

晉

南北朝

周隋

顧榮彥先吳國吳人也祖雍吳丞相父穆宜都
太守榮弱冠仕吳爲黃門侍郎吳平與陸機兄
弟同入洛例拜郎中歷廷尉正恒縱酒酣錫趙
王倫篡位子虔爲大將軍以榮爲長史倫敗榮
被執將誅得免齊王冏召爲大司馬主簿冏擅
權驕恣榮懼及禍終日昏酣不綜府事轉爲中
書侍郎及冏誅以功封嘉興伯轉太子中庶子

長沙王又為驃騎復以為長史又敗轉成都王
穎丞相從事中郎惠帝幸臨漳以榮兼侍中及
帝西遷長安徵為散騎常侍以世亂不應遂還
吳屬廣陵相陳敏反南渡江阻兵據揚州假榮
右將軍舟陽內史榮數踐危亡恒以恭遜自免
未幾榮恐終陷逆黨乃與甘卓紀瞻潛謀起兵
攻敏事平還吳永嘉初徵拜侍中行至彭城見
禍難方作遂輕舟而還琅瑯王鎮江東以榮為
安東軍司馬加散騎常侍榮既南州士望躬處
右職朝野甚推敬之六年卒官表贈侍中驃騎

將軍開府儀同三司謚曰元追封為公開國食

邑于毗嗣官至散騎侍郎

陸機士衡吳郡吳人也父抗吳大司馬機身長

七尺其聲如鍾少有異才文章冠世抗卒領其

兵為牙門將時年二十而吳滅退居舊里靜學

十年太康末與弟雲俱入洛太傅楊駿辟為祭

酒駿誅累遷太子洗馬著作郎又轉中郎趙王

倫輔政引為相國叅軍預誅賈謚功賜爵關

中侯倫將篡位以為中書郎倫誅齊王罔收付

廷尉得減死徙邊遇赦而止時中國多難顧榮

戴儼咸勸機還吳機不從罔敗成都王穎以機
叅大將軍軍事表為平原內史太安初穎與河
間王顥討長沙王乂假機後將軍河北大都督
督諸軍二十萬人乂奉天子車駕與機戰於鹿
苑機軍大敗多赴澗死時宦人孟玖譖機於穎
言其有異志冠軍牽秀證之穎大怒使秀密收
機害於軍中年四十三子蔚夏亦同時被害凡
著文章三十餘篇第雲

雲字士龍性清正有才理少與機齊名年十六
舉賢良吳平入洛拜公府掾太子舍人出補浚

儀令一縣稱為神明去官百姓圖畫其形配食
縣社尋拜吳王晏郎中令雲愛才好士多所貢
達入為中書侍郎成都王穎表為清河內史穎
討齊王冏以雲為前鋒都督冏誅轉大將軍司
馬孟玖欲用其父為邯鄲令雲固執不許玖深
忿怨及機敗并收雲殺之時年四十二有二女
無男門生故吏迎喪葬清河修墓立碑四時祠
祭撰新書十篇

顧衆長始吳郡吳人榮族弟也父祕交州刺史
元帝為鎮東將軍衆以討華軼功封東鄉侯辟

丞相掾及帝踐祚除為義興太守加揚威將軍
蘇峻反王師敗績衆還吳潛圖義舉時吳國內
史庾水及會稽吳興晉陵義興諸內史並檄衆
為五郡大都督護統諸義軍峻平論功封鄱陽
縣伯拜丹陽尹入為侍中轉尚書以母憂去職
穆帝即位徵為領軍將軍遷尚書左僕射永和
二年卒年七十三追贈特進光祿大夫謚曰靖
子昌嗣為建康令中軍諮議參軍

顧和字孝衆族子總角便有清操王導為揚州
辟從事累遷尚書中郎領晉陵太守咸康初

拜御史中丞劾奏尚書左丞戴抗賊汗百萬付
法議罪并免尚書傅玩郎劉備官百僚憚之遷
侍中轉吏部尚書徙領軍將軍康帝即位拜銀
青光祿大夫領國子祭酒進尚書令永和七年
以疾篤辭位拜左光祿大夫儀同三司加散騎
常侍令如故其年卒年六十四追贈侍中司空
謚曰穆子淳給事黃門侍郎

陸曄字光少有雅望機從弟也元帝初鎮江左
辟為祭酒以功封望亭侯元年拜侍中明帝即
位代紀瞻為尚書左僕射尋加金紫光祿大夫

爲領軍將軍以功進爵江陵伯帝不豫曄與王
導卜壺庾亮溫嶠郗鑒並受顧命輔皇太子更
入殿將兵直宿遺詔曄可錄尚書事成帝踐祚
拜左光祿大夫開府儀同三司蘇峻作亂隨帝
在石頭時共推曄督宮城軍事峻平加衛將軍
以勲進爵爲公咸和中卒追贈侍中車騎大將
軍謚曰穆弟玩

玩字士璠器量淹雅弱冠有美名元帝在江東

引爲丞相參軍累遷尚書左僕射蘇峻反與兄
曄俱守宮城以功封興平伯轉尚書令又授左

光祿大夫開府儀同三司王導郗鑒庾亮繼卒
乃遷玩侍中空卒謚曰康弟納

納少有清操貞厲絕俗州舉秀才累遷吏部郎
吳興太守至郡不受俸祿徵拜吏部尚書遷尚
書左僕射尚書令卒贈左光祿大夫

附

文學忠義各一人

張翰吳人吳大鴻臚儼之子也有清才美望

博學善屬文詞義新麗造次立成而縱任
不拘會稽賀循赴命入洛經吳閶門翰便

同載即去而不告家人齊王冏辟爲大司
馬東曹掾冏時執權翰慮禍及遂命駕歸
著首丘賦見志俄而冏敗人皆謂之見幾
然府以其輒去除吏名翰任心自適不求
當世時人貴其曠達著文筆數十篇
張禕龍驤將軍敞子也少有操行晉恭帝爲
琅琊王以禕爲郎中令及帝踐祚劉裕以
禕帝之故吏素所親信封藥酒一甕付禕
密令鴆帝禕既受命於道自飲而死

宋

張裕茂度吳郡吳人也曾祖澄晉光祿大夫善
正書父敞晉龍驤將軍裕初爲大尉叅軍累遷
揚州別駕武帝伐劉毅留任州事出爲都督廣
州刺史平越中郎將綏靜百越嶺外安之元嘉
中拜光祿大夫加金章紫綬卒謚恭子子演鏡
永辯岱俱知名

演仕至太子中舍人

鏡善清言仕至新安太守

永涉獵書史能爲文章善隸書騎射雜藝觸類
兼善爲文帝所知元嘉二十九年拜揚威將軍

冀州刺史明帝即位加冠軍將軍都督會稽東陽臨海永嘉新安五郡諸軍事以功封孝昌縣侯六年加護軍將軍領石頭戍事遷金紫光祿大夫元徽二年卒子瓌稷陸徽休猷吳郡吳人郡辟主簿累遷司徒左西掾元嘉二十三年拜使持節都督益寧二州諸軍事寧朔將軍益州刺史蜀土安悅卒贈輔國將軍謚曰簡子

附

孝行玄學各一人

張敷雍州都督邵子也性整貴好讀玄書兼屬文論武帝召見奇之以爲世子中軍參軍元嘉中拜黃門侍郎父在吳興亡敷往奔赴自發都至成服凡十餘日始進水漿

葬畢不

哭

遂毀瘠成疾未朞而卒孝武詔贈

行中

陸脩靜吳郡吳人早通墳籍長慕神僊棲廬山東林寺與陶潛慧遠結白蓮社宋文帝表其高風召至都作停霞寶贊使徐湛宣旨留之一不可大始三年作崇虛館通僊堂

吳國志卷九
強招之使講道元徽五年卒年七十二謚
簡寂先生詒以所居爲簡寂觀

齊

張岱景山裕子明帝元徽中爲使持節都督益
寧二州軍事益州刺史徵拜侍中遷吏部尚書
弟恕旣害吳郡太守劉遐齊高帝欲以恕爲晉
陵郡岱曰若以家貧賜祿此所不論語功推事
臣門所耻加散騎常侍建元二年遷金紫光
祿大夫領鄱陽王師武帝即位復以爲使持節
監南充青冀五州諸軍事卒謚貞子

張緒思曼鏡子少知名清簡寡欲宋明帝元徽
初爲侍中嘗私謂客曰一生不解作諾由是出
爲吳郡太守齊臺建加散騎常侍建元元年
中書令緒善談玄深見敬異王儉嘗云緒過江
所未有北士可求之耳及立國學以緒爲太常
卿領國子祭酒緒長於周易言精理奧見宗一
時常云何平叔不解易中七事武帝即位轉吏
部尚書祭酒如故永明元年遷金紫光祿大夫
加給事中緒每朝見武帝目送之緒口不言利
有財輒散之清談端坐或竟日無食門生爲之

辨殮死之日無宅可殯遺命止以蘆葭犇車引
柩靈上置杯水香火不設祭謚簡子第克

陸閑避業慧曉從子有風槩不苟合仕至揚州
別駕明帝崩因感心疾不復預州事永元末刺
史始安王遙光據東府作亂臺軍陷城闕以綱
佐被收尚書令徐孝嗣啓閑不豫逆謀未及報
被誅四子厥絳完襄

厥少有風槩好屬文永明九年州舉秀才閑被
誅厥坐繫尚方尋有赦厥恨父不及感慟而卒
年二十八有文集十卷

絳閑臨刑時抱頸求代不獲以身蔽刀行刑者
併害之

張冲思約宋雍州都督邵子東子也少辟州主
簿累遷盱眙太守永明八年假節監青冀二州
行刺史事明帝即位除黃門郎加征虜將軍永
元二年爲郢州刺史進封定襄縣侯梁武起兵
手書喻意冲確然不回東昏遣使領兵及糧運
送冲使拒西師明年二月梁武軍主曹景宗過
江攻郢城冲固守不屈病將死厲府僚以誠節
言終而卒冲子孜及長史程茂固守東昏詔贈

冲散騎常侍護軍將軍後二日茂使攷爲書與
梁武以郢城降

附

儒林文學忠義各一人

陸澄少好學博覽永明元年拜度支尚書領
國子博士衛軍王儉集學士何憲等盛自
商畧澄待儉語畢然後談所遺漏數百千
條皆儉所未覩官至光祿大夫隆昌元年
卒謚靖子澄當世稱爲碩學欲撰宋書竟
不成家多墳籍

張融暢子解褐爲宋封溪令浮海至交州作
海賦以示顧凱之凱之曰卿此賦實超玄
虛但恨不道塩耳融即求筆注曰漉沙搆
白熬波出素積雪中春飛霜暑路此四句
後所題也舉秀才對策中第稍遷中書郎
非其所好高帝素愛融爲太尉時與融款
接見融常笑曰此人不可無一不可有二
永明八年遷黃門郎融玩涉百家長於佛
理著三宗論

陸超之齊江州刺史晉安王子懋防閤也隆

昌元年宣城公驩既專廢立又殺諸王遣
將至江州害子懋或勸超之逃亡超之曰
人皆有死此不足懼吾若逃亡孤晉安之
春端坐俟命門生欲得賞自後斬之頭墮
而身不僵及殯歛門生亦助舉棺棺墜壓
其首折頸而死

梁

張充延符緒弟多所該通尤明老易能清言仕
齊官為侍中義師近次東昏召百官入宮省朝
慮禍或往來酣宴充獨居省不出閤城內既

善東昏百官集西鍾下召充不至武帝霸府建
以充為諮議叅軍轉司徒左長史天監初遷吏
部尚書居選平允拜國子祭酒充長於義理登
堂講說皇太子以下皆至時王侯多在學執經
拜充朝服而立不敢當禮拜尚書左僕射頃之
除吳郡太守以疾自陳徵為散騎常侍金紫光
祿大夫卒詔贈護軍將軍謚穆子

陸襄師卿齊揚州別駕閑子初為昭明太子洗
馬遷中庶子並掌管記中大通三年太子薨官
屬罷妃蔡氏別居金華宮以襄領步兵校尉太

子妃家令知宮事太清元年爲度支尚書侯景圍臺城襄直侍中省城陷奔還吳義兵夜襲郡殺景偽太守蘇單于推襄行郡事襄與景將宋子儂戰於松江敗績憂憤卒年七十襄弱冠遭家禍釋服猶若居憂終身蔬食布衣不聽音樂五十許年侯景平元帝贈侍中雲麾將軍以建義功追封餘干縣侯

附

儒林清賢忠義各一人

皇侃青州刺史象九世孫少好學尤明三禮

孝經論語起家國子助教善講說聽者常數百人撰禮記講疏五十卷奏上詔付祕閣頃之召入壽光殿說禮記義武帝善之加貞外散騎侍郎卒所撰論語義十卷與禮記義皆行於世

顧協晉司空和六世孫幼孤舉秀才爲廷尉正天監十五年敕徐勉入華林撰編畧勉舉協應選成書七百卷召拜中書通事舍人協清介有志操自丁艱憂終身布衣蔬食不復更娶卒無胤嗣年七十三無衾以

欽武帝悼惜詔資給喪事并贈散騎常侍
謚曰溫子撰異姓苑瑣語二書文集十卷
張嶷梁左僕射稷子方雅有至操能清言起
家祕書郎累遷吳興太守侯景陷建鄴賊
行臺劉神茂攻破義興遣使說嶷嶷斬其
使仍遣軍破神茂遣其中軍侯子鑒
助神茂擊嶷嶷親出督戰城陷嶷釋戎服
坐於廳事賊臨以白刃不屈執送景景將
舍之嶷曰速死為卒乃斬之子弟遇害者
十餘人景欲存其一子嶷曰吾一門只在
鬼錄不就爾處求恩於是皆死賊手元帝
追贈侍中謚忠子

陳

陸繕士繻吳郡吳人梁太常卿倕子幼有志尚
以雅正知名承聖中授中書侍郎掌東官管記
江陵陷遜還京師高祖引為司徒司馬領步兵
校尉文帝太建元年加侍中遷尚書左僕射參
掌選事尋領前將軍命與徐陵等七人參議政
事卒贈特進金紫光祿大夫謚曰安子
顧野王希馮吳郡吳人野王幼好學七歲讀五

經畧知大旨九歲能屬文嘗制曰賦朱异見而
奇之年十二隨父之官撰建安地記二篇及長
徧觀經史天文地理著龜卜候蟲篆奇字無所
不通又善丹青宣城王爲揚州刺史用爲賓客
王於東府起齋令野王畫舌賢命復書贊時稱
三絕及侯景亂野王丁父憂歸本郡郡將袁君
正舉兵赴援丈檄皆以委之口占便就未嘗立
草野王體素清羸裁長六尺至是召募鄉黨隨
義軍援都杖戈陳義見者莫不壯之城陷奔會
稽陳天嘉中救補撰史學士太建中領大著作

嘗撰國史知梁史事後爲黃門侍郎光祿卿知
五禮事卒贈祕書監右衛將軍所撰有玉篇輿
地志符瑞圖分野樞要續洞冥記玄象表通史
要思諸書

附

孝行一人

張昭吳人幼至孝父孱病消渴嗜鮮魚昭結
網捕魚以供膳弟乾亦有至性父卒兄弟
並不衣絲不食鹽酢日食一升麥屑粥每
感慟必嘔血父服未終毋陸又卒兄弟毀

瘠骨立家貧未得大葬布衣蔬食十有餘
年年未五十並終于家嗣息俱絕

周隋

陸通仲明吳人曾祖載宋時隨王子義真鎮長
安遂沒赫連氏父政歸文帝爲行臺左丞原州
長史通亦被引爲帳內督大統元年以功封都
昌縣侯九年進授驃騎大將軍儀同三司大僕
卿賜姓步六孤氏進爵綏德郡公孝閔踐祚累
遷大司馬卒第逞

逞襲父爵爲羽林監叅隋公大丞相府軍事保
定初進爵爲公遷納言卒贈大將軍

附

儒林一人

褚暉以三禮學稱於江南煬帝時擢爲大學
博士撰禮疏一百卷

吳邑志卷第八